



18. august 2023

UKA 2023/116

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**“Inuuniarnermikkut ajornartorsiuteqartut pillugit siunnersuisooqatigiit” pilersinneqarnissaannut Naalackersuisut peqquneqassasut Inatsisartut aalajangiiffigisassaattut siunnersuut.**

(Inatsisartunut Ilaasortaq Jens-Frederik Nielsen, Demokraatit)

### **Tungavilersuut**

Qularutigineqarsinnaangilaq tamattaalluta inoqatigit pitsaanerpaamik atugaqarnissaannik kissaassisaratta. Tamarmik pitsaasumik inuuneqarnissaat kissaatigisarpaput. Ajorluartumilli tamarmik taamaangillat – nunatsinni nunanilu allani. Piffinni tamani inuuniarnermikkut ajornartorsiutillit takuneqarsinnaasarput.

Inuuniarnermikkut ajornartorsiutigineqartut assigiinngitsorujussuusinnaapput. Angerlarsimaffeqannginneq, aangajaarniutinik atornerluinerit, tarnikkut nappaateqarneq allallu peqqutigineqarsinnaapput. Tamanulli assigiissutigineqarsinnaasoq, inuiaqatigiinni akuunnginneq – ajornartorsiuteqartuummata – inuuniarnerat oqimaatsoq.

Isumaqarpunga maani inersuarmi ataatsimoorfigisipput inuuniarnermikkut ajornartorsiutillit inuunerinnerulernissaannik ikiorsernissaat. Oqallinnerni taamaattuni attuumassuteqanngittuniit ilisimasallit ilinniarsimasullu tusarnissaat maqaasinarsinnaasutut isigaara.

Assersuutiginiangikkaluarlugu Aningaasaqarnermut Siunnersuisooqatigiit nalunaarusiat innersuussutillu saqqummiunneqartartut nuannaarutigisarpakka. Oqallinnissamut tungaviliisarput politikikkullu aaliangiinissamut aqutissiuussisarlutik.

Aningaasaqarnermut Siunnersuisooqatigiit politikikkut attuumassuteqanngitsuuvoq aammalu ilinniarsimasunik ilisimasalinnillu inuttalorsorneqarsimalluni, taamaasillunilu Aningaasaqarnermut Siunnersuisooqatigiit tatiginassuseqarluartumik tungaveqarput.

“Inuuniarnermikkut ajornartorsiuteqartut pillugit Siunnersuisooqatigiit” assingusumik aaqjissuunneqarsinnaanera takorusukkaluarpara. Innuttaasut ajornartorsiorderpaat pillugit politikikkut aaliangersaasarnermut tungavileeqataasinnaasut isumaqarpunga. “Inuuniarnermikkut ajornartorsiortut pillugit Siunnersuisooqatigiit” ilinniarsimasut ilisimasalillillu inuttarisaaniit misissuinerit, ajornartorsiortut pillugit politikikkut aaliangersaanissamut attuumassuteqanngitsumik tungavilersueqataanissaat ingerlanneqassagaluarpoq.

“Inuuniarnermikkut ajornartorsiuteqartut pillugit Siunnersuisooqatigiit” qularinngilluinnarpara inuuniarnermikkut ajornartorsiutillit pillugit suliniuteqarnitsinnut tunaartaqarnerulersitsissasut



eqaallisaaqataallutillu, tamannalu nunatsinni amerlanerit inuunerissaarnerulernissaannut aqutissiuussissalluni.

§37 tungavigalugu apeqquteqaat normu 105/2023 akissutaa naapertorlugu Naalakkersuisut “Inuuniarnermikkut ajornartorsiuteqartut pillugit Siunnersuisooqatigiit” pilersissinnaanera periarfissakippoq<sup>1</sup>. Naalakkersuisut naapertorlugit pineqartumut ilisimasat annikippallaarneri pissutaavoq, taamaasillunilu “Inuuniarnermikkut ajornartorsiuteqartut pillugit Siunnersuisooqatigiit” innersuussuteqarnissaat ajornakusuussalluni. Iluamik oqassaguma Naalakkersuisunit isumarineqartq upperinninngippallaartutut nalilerusuppara. “Inuuniarnermikkut ajornartorsiuteqartut pillugit Siunnersuisooqatigiit” ilisimasat aammalu pineqartuni pitsanngoriaatissat ilisimaneqarnerulernissaanik qaqitseqataanissaannuna periarfisseeqataasussat. Taamaattumik “Inuuniarnermikkut ajornartorsiuteqartut pillugit Siunnersuisooqatigiit” isumassarsiatsialaanera attappara.

Taamatut oqaaseqarlunga inatsisartuni partiit siunnersuutinnut qanoq isumaqarnerisut tusassallugit qilanaaraara ilalerluarneqarnissaalu neriutugalugu.

#### **Pisortanut aningaasatigit allaffissornikkullu kingunissai**

Aningaasanut Inatsimmi konto pingaarneq 20.01.01 naapertorlugu ukiumut 1 million koruunit Aningaasaqarnermut Siunnersuisooqatigiinnut immikkoortinneqartarput. “Aningaasaqarnermut Siunnersuisooqatigiit” pillugit aningaasartuutigineqartartulli piffissami 2019-2023 agguaqatigiissillugu ukiumut 524.000 koruuniusimapput. 2023-mi juni ilanngullugu 449.000 koruunit atorneqarsimapput<sup>2</sup>. Naliliinera naapertorlugu “Aningaasaqarnermut Siunnersuisooqatigiit” aningaasartuutaat “Inuuniarnermikkut ajornartorsiutillit pillugit Siunnersuisooqatigiit” aningaasartuutissaasa qaangernaviangilaat.

#### **Namminersorlutik inuussutissarsiuteqartunut aningaasatigit allaffissornikkullu kingunissai**

Soqanngilaq.

#### **Innuttaasunut aningaasatigit allaffissornikkullu kingunissai**

Soqanngilaq.

---

<sup>1</sup> Akissut §37-apeqqut normu 105/2023

<sup>2</sup> Akissut §37-apeqqut normu 105/2023